

皇
清
經
解

金

清

經

解

皇清經解卷三十八上

學海堂

禹貢錐指

德清胡明經

導岍及岐至于荆山逾于河

釋文導音道岍音牽字又作汧馬本作開

傳曰三山皆在雍州河謂梁山龍門西河正義曰地理志云

吳岳在扶風汧縣西古文以為汧山岐山在美陽縣西北荆

山在馮翊懷德縣南蔡氏曰逾者禹自荆山而過于河也孔

氏以為荆山之脈逾河而為壺口雷首者非是渭按導者循

行之謂導山猶曰隨山蘇氏云自此以下至敷淺原皆隨山

之事是也導山時尚未施功先儒皆以此為通水曰導山之

澗谷而納之川殊失經旨汧縣今為鳳翔府之隴州州南三

里有汧縣故城岍岐荆並在河西渭北禹首導此三山而逾

河以抵壺口則冀州之所先治者其規畫早定於胷中矣

導山之義傳云治水通山故以山名之正義云所治之山本以通水舉其山相連屬言此山之旁所有水害皆治訖也王氏云導澗谷之水而納之川葉氏云濬兩山之川屬之大川以同入于海傅氏云畎澮之水不勝其記故禹卽山以表之以上諸說皆以導山爲通水相沿至今吾不知其所謂導者導之於敷土之後乎抑導之於九州功畢之日乎林少穎云洪水懷山襄陵凡故山舊瀆不復可見將欲施功無所措也必先順因其勢以高山爲表識自西決之使歸於東以少殺其滔天之勢於是川瀆之迹稍稍可求乃決九川而距四海此謂導之於敷土之後也張子韶

云山而謂之導者以向者洪水滔天首尾不辨今水患既除使山川復其本性隨山之勢窮極其首尾以遂其風土之宜此謂導之於九州功畢之日也如林所言則九川未決平地皆爲巨浸導此澗谷之水將安歸乎如張所言則禹每治一州畢卽周知其風土之宜貢賦已定何必更煩跋履二者皆無當於經旨導山只是予乘四載隨山刊木之事其施功則分見於九州篇首隨山刊木句是史辭導山四節則禹歷敘所經以告於上元非重複導者循行之謂非通水之謂也

岍一作汧

說文有汧字而無岍字

汧縣唐爲汧源縣隴州治明省縣

入焉周禮雍州山鎮曰嶽山漢志以吳山爲雍州山是吳

山卽嶽山也爾雅河南華河西嶽河東岱河北恒朱長孺
云商周之世疑以岼爲西嶽故爾雅職方皆名嶽山水經
注汧水出汧縣之蒲谷鄉弦中谷決爲弦蒲藪爾雅曰水
決之澤爲汧也汧水東逕汧縣故城北會龍魚川水又東
會一水發南山西側俗以此山爲吳山三峯霞舉疊秀雲
天崩巒傾返山頂相捍望之恒有落勢地理志曰吳山在
縣西古之汧山也國語所謂虞矣

古字虞與吳同

今按吳嶽班酈

皆謂卽古之岼山然史記封禪書言自華以西名山七曰
華山薄山嶽山岐山吳嶽鴻臚山而無岼山又析吳嶽
與嶽山而爲二唐六典關內道名山曰吳山亦謂之西鎮
山有五峯於諸山中最爲秀異肅宗在鳳翔改吳山爲西

嶽以祈靈助隴州志則以州西四十里之吳山爲岼山州南八十里之嶽山爲吳嶽諸說互異未知孰是愚竊謂吳山漢志雖云在縣西而岡巒綿亘延及其南與嶽山只是一山自周尊岼山曰嶽山俗又謂之吳山或又合稱吳嶽史記遂析嶽山與吳嶽爲二山而岼山之名遂隱其實此二山者周禮總謂之嶽山禹貢總謂之岼山當以漢志爲正蔡傳引晁氏說又謂今隴山天井金門秦嶺皆古之岼山不知何據

漢志美陽縣下云禹貢岐山在西北中水鄉周太王所邑詩曰率西水滸至于岐下又曰彼徂矣岐有夷之行是水經注岐水逕周城南城在岐山之陽而西所謂居岐

之陽也非直因山致名亦指水所稱矣又歷周原下北則中水鄉成周聚故曰有周也水北卽岐山矣今按岐山一名天柱山其峯高峻狀若柱然國語周之興也鸞鸞鳴于岐山故俗呼爲鳳凰堆山之南周原在焉詩所稱周原膺膺者也東西橫亘肥美寬平在今岐山縣東北四十里史記周勃從定三秦賜食邑懷德尋置襄德縣漢志云禹貢北條荆山在南山下有彊梁原洛水東南入渭帝王世紀云禹鑄鼎於荆山在馮翊懷德之南今其下有荆渠也水經注云渭水東逕平舒城北城南面通衢昔秦始皇將亡江神反壁於華陰平舒道謂此也渭水之北沙苑之南卽懷德縣故城地理志曰禹貢北條荆山在南山下有荆渠

卽夏后鑄鼎處也括地志云懷德故城在同州朝邑縣西南四十三里平舒故城在華州華陰縣西北六里蓋二城隔水南北相直也富平縣亦有懷德故城水經注云沮水東南歷土門南原下東逕懷德城南城在北原上又澤泉水東逕懷德城北東南注鄭渠合沮水此皆富平之懷德城也通典云晉自彭原移富平於今縣西南懷德城寰宇記云懷德故城在今富平縣西南十一里非漢襄德縣也蓋後漢末及三國時因漢舊名於此立縣今有廢城存然則荆山當在今朝邑縣境而隋志云富平縣有荆山括地志云荆山在雍州富平縣今名掘陵原元和志云在富平縣西南二十五里長安志云在縣西南二十里縣志云山

下有荆渠近渠卽彊梁原也而朝邑並無之二懷德城未知孰爲西漢之舊縣然愚嘗以理揆之有可證者二寰宇記引水經注云洛水東南歷彊梁原俗謂之朝坂今富平無洛水而朝邑有洛水歷彊梁原入渭原在荆山下一證也同州志云華原在朝邑縣西繞縣西而北而東以絕於河古河壩也一名朝坂亦謂之華原山蓋華原卽朝坂朝坂卽彊梁原

周建德二年於原上置長春宮

荆山之麓直抵河壩禹從此

渡河故曰至于荆山逾于河若富平則東距河二百餘里

與經意不合二證也朝邑實西漢之襄德荆山當在其境

唐人所以致誤者蓋由先儒謂漆沮卽洛水而澤泉逕富平懷德城北東南絕沮注濁水得漆沮之名遂以此爲漢

志東南入渭之洛并荆山亦移之富平耳

王氏日記云荆山蔡氏以爲卽今耀州富平縣掘陵原而

三原馬伯循

理

則以此原爲唐之獻陵非山也四夷郡縣

圖記謂黃帝鑄鼎處在今三原嵯峨山蓋嵯峨卽荆山也
其山高出雲表登其巔則涇渭黃河俱在目前俯視秦川
其平如掌其別嶺有西原中原東原乃縣之所由名也山
陽有鼎州卽黃帝鑄鼎處岐東惟嵯峨爲大嵯峨之爲荆
山明矣渭按漢志嶽薛山在馮翊池陽縣北師古曰卽今
俗所呼嵯峨山也音截齧寰宇記云嶽薛山在雲陽縣東
北十里一名慈娥山王褒雲陽宮記東有慈娥山是也土
人謂之嵯峨山昔黃帝鑄鼎於此然未嘗指嵯峨爲荆山

也唯劉昭注補郡國志曰雲陽縣有荆山引皇甫謐帝王
世紀爲證是以此爲懷德之荆山矣然昭於池陽縣下仍
云有嶺薛山在北亦未嘗以荆山當嶺薛也余以圖志考
之今涇陽縣本漢池陽雲陽二縣地嵯峨山在縣北接淳
化三原二縣界淳化亦雲陽地三原亦池陽地也蓋此山
跨三縣之境昭所謂雲陽之荆山與池陽之嶺薛實一山
也伯循之說與昭闇合而愚竊謂不然富平東距河二百
餘里三原更在富平西六十里禹至此何得便云逾于河
伯循三原人欲引禹貢之荆山以爲其鄉重獨不顧經意
之離合乎禹自岐至荆九變甘泉嶺薛其所必由也當包
在至于二字中唯荆山之麓爲彊梁原者直抵河壩禹從

此渡河故特志之不必其山高出雲表如嵯峨也唐高祖
獻陵長安志云在富平縣東十八里伯循謂卽掘陵原然
蔡說本括地志志魏王泰撰也豈有園陵所在而襲此掘
陵之惡名以筆之書乎且元和志云掘陵原在富平縣西
南二十五里而獻陵在縣東十八里相去頗遠此原必非
獻陵也地理之學至宋爲已疎明人尤多不根之談當痛
絕之

荆山有三一在雍域襄德北條之荆大禹鑄鼎處也一爲
荆豫界臨沮南條之荆卞和得玉處也一在豫域與禹貢
無涉漢郊祀志公孫卿曰黃帝采首山銅鑄鼎於荆山下
按唐志號州湖城縣有覆釜山一名荆山元和志山在縣

南卽黃帝鑄鼎處晉灼以爲在馮翊懷德縣非也湖城元

省入閬鄉縣山今在縣南二十五里

縣屬河南府陝州

韓愈詩云

荆山已去華山來日照潼關四扇開李商隱詩云楊僕移關三百里可能全是爲荆山卽此山也蘇傳以此爲北條之荆因晉灼而誤

河爲西河在朝邑縣東三十五里與山西之蒲州分水禹四載水行乘舟逾河入海過九江皆乘舟之事也所涉之川不可勝舉河海九江其最大者故特志之

壺口雷首至于太岳

傳曰三山在冀州太岳上黨西正義曰地理志云壺口在河東北屈縣東南雷首在河東蒲坂縣南太岳在河東彘縣東

是三山在冀州以太岳東近上黨故云在上黨西也渭按漢上黨郡今山西潞安府是蒲坂今爲平陽府之蒲州其故城在州東南漢縣舜所都也餘見冀州

導山自荆逾河爲壺口故於冀言壺口於雍言龍門漢志亦云壺口在北屈龍門在夏陽則兩山夾河而峙東爲壺口西爲龍門明矣自後魏太平眞君七年改漢河東皮氏縣曰龍門縣而龍門之名遂被於東岸故顏師古注司馬遷傳曰龍門山其西在今同州韓城縣北其東在今蒲州龍門縣北也龍門縣宋故曰河津縣縣西北二十五里有龍門山蓋卽壺口之南支古時東岸無龍門之名也河水

傾注其中形如壺然故名壺口

據古州志

江海大魚至此不得

上上則爲龍故名龍門

據辛氏三秦記

兩山對峙體分而勢合東

必得西而始成其爲口西亦必得東而始成其爲門舉此可以見彼壺口之治卽龍門之治故冀州與導山言壺口而不言龍門至于龍門卽至于壺口故雍州與導河言龍門而不言壺口其文互相備云

雷首山在今蒲州南一名首陽山詩唐風采芣采芣首陽之顛論語伯夷叔齊餓於首陽之下馬融曰首陽山在蒲坂河曲之中寰宇記云首陽卽雷首之南阜也或稱首山漢地理志蒲反有首山祠郊祀志黃帝采首山銅卽此亦稱獨頭山關駟曰首陽山一名獨頭山夷齊所隱也又名襄山穆天子傳云東巡自河首襄山又名薄山穆天子傳

云登薄山寘軫之陞史記封禪書云薄山者襄山也又名堯山漢地理志蒲反有堯山水經注云雷首山臨大河北去蒲坂三十里俗亦謂之堯山也又名中條山元和志云雷首一名中條在河東縣南十五里永樂縣北三十里寰宇記云中條山在芮城縣北十五里亦曰薄山也又名陟山寰宇記云堯山在河東縣南二十八里卽雷首山山有九名亦卽陟山湯伐桀升自陟注在河曲之南卽此也括地志云此山西起雷首東至吳坂長數百里隨地異名通典云雷首在今河東縣此山凡有八名歷山首陽山薄山襄山甘棗山中條山渠豬山獨頭山也蒲州新志首陽山在州南四十五里又中條山在州東南十五里山狹而長